



**United States den
jembishinü masür: Iran**

**Newcastle-i Braga keeper
Hornicek £25.7m agi alizükogo**



Tanü Phesama Sinking area shibangtsü

Dimapur, August 3, 2026 (TYO): August 4, 2026 anepdang 6:00 ako nungi nikongdang 6:00 ako tashi National Highway-2 (Kohima-Mao section) nung Phesama Sinking area ajanga süiba lenmang shibangtsü ta Kohima District Magistrate-i metetdaksüogo.

Iba tesem kübok Chainage Km 191+840 aser Km 192+100 tsüngda tenemlen nungi lung alur ta National Highways & Infrastructure Development Corporation Limited (NHIDCL), PMU Jakhama ajanga osang sangoktsüba sülen lenmang khen atema shibanger mapa inyaktüsü.

ta Kohima DM-i ashi.

Iba mapang Heavy Motor Vehicles (HMTVs) mesenzüdaksütsü ta District Magistrate B. Henok Buchem, NCS-i sangdong ka nung ashi.

Light Motor Vehicles (LMVs) atema Phesama Rhododendron Resort ajanga Kisama-Kigwema len two-way sensüdaksütsü.

Manipur-i aoba gari tulutem Peren District ajanga senzütsü aser rongdak mapatem atema Kohima-Jessami aser Chakhabama-Zunheboto lenmangtem ajanga senzütsü akok ta Kohima DM-isa metetdaksüogo.

Dimapur police-i cocaine network ka makdok

Dimapur, August 3, 2026 (Agencies): Dimapur police-i nisung pungu den cocaine ya temulung melemi bilemba gram 33 shi apuba ajanga interstate cocaine trafficking network ka makdokogo.

Police-i apuba cocaine ji forensic examination atema bener yokogo.

Dimapur nung Tohuka Sema (35) ta ser cocaine supplier ta tai tonglokja alir ka apuba ajanga drug trafficking syndicate bushiteta liasü. Iba syndicate ya state asem nung inyaksangshir aser Nigeria nunger katia shilem agir ta Dimapur DCP (Crime)-i ashi.

Dimapur Police-i apuba tanüngba nisungtemji Yeka Awomi (30), Biresh Kumar (22), Akhtar Hussain (35) aser

Swantheiba Inkah (25) nunger lir. Awomi ya Pune, Maharashtra nung apu aser Biresh Kumar o Akhtar Hussain na Delhi nung apu. Külen, Inkah ya delivery agent ka ama inyak aser pai mozü shibelenba nung yaritep ta Dimapur Police-i ashi.

Iba network nung temulung melemi bilemer nisung ana tang Nagaland adena orr jenshir aser police-i tena aputsü atema bushitepa arudar.

Iba syndicate ajanga commercial courier aser DTDC Courier Services dena parcel delivery services amshi. Parnoki suppliers, handlers aser delivery agents shima yur item services ajanga cocaine alizük aser prokshi ta police-i bushisüngdang arudang kulitem angu.

Manipur nung NSCN-IM aser ZUF tsüngda khatep

Imphal, August 3, 2026 (Agencies): Manipur nung Deobar nikongdang National Socialist Council of Nagaland-Isak-Muivah (NSCN-IM) aser Zeliangrong United Front (ZUF) tsüngda khatepba ajanga tensa mejungi aküm.

Deobar nikongdang 6:10 ako meta ka nungi khatep tenzük aser ghonda tesadang ka shi khatep. Ajisüaka iba tatalokba nung nisung asüba mesüra yiruyibong asüba osang kecha maliasü ta ketdangsürtemi ashi.

Iba tatalokba ajanga temeket nung alirtem kanga aoksatep aser senzäsenbonger aika len tom nung anenzüktsüsa aküm.

Aonung asüba agi security forces tesem tonga arudang timtem ajuru aser mapang shitak nung tonga marutet.

Rongmei Luh Phuam (RLP) ta ser tetsür telok kati NSCN-IM aitsüogo. NSCN-IM züngsemtem Irang Bridge tashi

gari ka nung aru aser tetsüng agi ZUF pur alidak tonga orr khatep ta parnoki tai tongloksür.

Nisung alidak aser aluyimba tesemtem nung mapang shia khatepba atema tebilemtsü abener aser telok anaprongi rara ajanga masü saka olemtep ajanga ken o tem angatteptsü ayongzüker ta RLP-i ashi.

Külen, Zeliangrong Welfare Association, Delhi (ZWAD)-ia khatepba atema tebilemba abenba osang lemsatepogo. ZWAD-isa Zeliangrong tesemtem nung civil society organizations ajak tiyongtsü nung alitsü aser shinga tsütsü tejak mashitsü mepishia metetdaksüogo.

Külen tsütsü shir sangdong agütsüba mesüra külen tsütsü aitsüba ajanga loktiliba nung telemsa tuluba adoktsü aser civil society-i yimjung o tensa süngjemtsü atema inyakba tashimait kümdaksütsü ta ZWAD-isa ashi.

NHAK nung Indian Organ Donation anogo amung



August 3, 2026 nü Naga Hospital Authority Kohima (NHAK) nung Indian Organ Donation amungdang Principal Director, Health & Family Welfare, Dr. Mereninla Senlem aser ketdangsürtemi living organ donors aser transplant recipients den külemi agiba noksa ka angur.

Dimapur, August 3, 2026 (TYO): August 3, 2026 nü Naga Hospital Authority Kohima (NHAK) nung Indian Organ Donation anogo mungogo.

Iba sentong ya MOHAN Foundation-i NHAK den yaritepa "Stories of Hope, Gifts of Life: Promoting Organ Donation in Nagaland" omen nung ajemdaker ayongzüka agiogo.

"Iba sentong ajanga asenoki organ donation indang tashi aser nübortem, kija aser kibongtem nem teimla bentsür aruba bilemtetdaksür" ta Principal Director, Health & Family Welfare, Dr. Mereninla Senlem-i ashi.

"Nagaland nung 'Stories of Hope, Gifts of Life' omen ajanga organ transplant shiaji tasütait, aria bilemba aser meimchir mulungsoaba liasü ta nenshir. Meimchir indang mapa tajungtibatem rongnung organ donation ya ka lir aser iba nung nisung ka lemtet ajanga taküm aika melenshitsü aser kümzüksü

tashi lir" ta Dr. Mereninla-isa ashi.

India nung asenok tezüngjang (kidney) majungba khuret tulu lir aser iba atema shiranger meyirjang aikati organ transplant atema atar. India nung 90,000 tashi waiting list period lir ta statistics ajanga ashir. Surgical tsütsü kanga tejakleni ogo saka organ donation atema loktilibai meteta alitsü aser shilem agitsü kanga nüngdaker ta lai ashi.

Nagaland nung asenoki organ donation aser transplant services tashi aittsü asoshi tongtipang mapang ka tang ya lir. Asen state nung transplant services mali saka infrastructure aser tanga nüngdakbatem renemtsü merangdar ta Dr. Mereninla-isa metetdaksü.

Naga Hospital Authority Kohima-i organ transplant services atema nüngdakba registration aser licensing maparen tenzükogo. Iba ya kanga tongtipang alizüng ka lir aser state sorkari asen sensotem

asoshi advanced healthcare tajungba agütsütsü tenangzüka sayur ta lai ashi.

MOHAN Foundation, SOTTO Nagaland, Naga Hospital Authority aser healthcare nisungtem den sendaktepa alir ajaki department den yaritepba atema pelar ta Dr. Mereninla-isa shisem.

"Organ donation ya healthcare rejutem aser sorkar agencies dak dang masü saka senso shiai shilem agi nung dang takok angutsü. Kibong, lokti aser shisaliok rejutem nungi iba osang meteta alitsüla aser organ donation atema jembitsüla. Senso shiai organ donation tali angazüktsü merangdi aser Nagaland ajungalen organ donation indang osang prokshitsü tezüngzüktep agitsü ayongzüker" ta laisa ashi.

Iba sentong nung living organ donors aser transplant recipients nungi kuli balala agütsü aser testimonial video screening sayua liasü.

Northeast nem flood management atema Rs 2,537 crore agütsüogo

New Delhi, August 3, 2026 (Agencies): Centre sorkari March 2026 tashi Northeastern state tem nem Flood Management and Border Areas Programme (FMBAP) kübok Rs 2,536.96 crore agütsüogo ta Ministry of Jal Shakti-i metetdaksüogo.

August 3, 2026 nü Rajya Sabha nung Minister of State for Jal Shakti Raj Bhushan Choudhary-i iba osang lemsatep.

State sorkartemi flood management aser anti-erosion works inyaker aser Centre-i FMBAP kübok technical guidance aser financial assistance agütsür. Iba ya flood control, anti-erosion, drainage development aser protection against sea erosion atema lir ta Choudhary-i ashi.

Central Water Commission

(CWC)-i linük kübok tesem balala nung station 360 nung short-range flood forecasts agütsür. Iba nung Northeast nunga station 53 dena lir, item ya inflow forecast stations 15 aser level forecast stations 38 lir ta paisa metetdaksü.

Flood Watch India mobile application, social media aser State Disaster Management Authorities den sendaktepa aliba Common Alert Protocol (CAP) ajanga flood forecasts osang prokshir ta Ministry-isa ashi.

Northeast nung river basin management aser flood forecasting tashi aittsü atema kidanger linüktem dena-a hydrological aser meteorological data lemsateper ta parnokisa metetdaksü.

Ministry of Jal Shakti-i mapang talangka flood mitigation

atema August 2025 nung state aser Union Territory ajak den Flood Plain Zoning indang technical guidelines agütsüogo. Iba ajanga scientific assessment aser regulation of flood-prone areas asütsü ayongzüka liasü.

Brahmaputra Board-i Northeastern states atema master plans 52 renemogo aser iba nung flood management atema structural aser non-structural measures dena lir ta Ministry of Jal Shakti-isa ashi.

State Disaster Response Fund (SDRF) ajanga state sorkartemi tzümetsüng agi kongshir nem immediate relief agütsür aser National Disaster Response Fund (NDRF)-i Inter-Ministerial Central Team ka ajanga asadangba sülen 'severe disasters' atema teyari talila agütsüsemer.

Longleng nung District Red Run 2026 ayongzük



District AIDS Control Officer (DACO) Longleng, Dr. Temsusashi aser NSACS staff Longleng den District Red Run 2026 nung takok angurtem külemi tangokba noksa nung angur.

Dimapur, Luroi/August 03 (TYO): HIV aser Sexually Transmitted Infections (STIs) indang awareness agütsü asoshi state tesem ajunga nung campaign tenzüka aliba nung shilem ka ama Nagaland State AIDS Control Society (NSACS) tawabangba kübok Longleng District nung District Red Run 2026 sentong takok ngua August 3, 2026 nü ayongzüka liasü.

Iba asemtep tenzüksü lia District AIDS Control Officer (DACO) Longleng, Dr. Temsusashi-i shilem agirtem den jembia HIV/AIDS aser

STIs indang awareness agüja jembia liasü.

Pai item tashidak nungi jenbua alitsü, kera tendangtsü, mesü-mekonga bilemba aser bendanga amshiba yimya samadaksütsü tongtipang lir ta ashi aser lanurtem dang temang anema alitsü yimya amshitsü ajungmesoa liasü.

Nisung kija shia-i meranga inyabga ajanga HIV maliba lokti yangretsü asoshi inyabka nung yarir, ta pai ashi.

Iba sentong nung arishi küm 17 nungi 25 tsüngta tebur aser tetsür temi tejangraba tulu nung arua shilem agia lanurtemi

awareness prokshiba nung temulung agütsüba sayua liasü.

Iba District Red Run sentong ya "Every Step Counts Against HIV and STIs" omen nung ajemdaker ayongzüka liasü.

District Red Run tebur category nung Katlong Phom, A. Phekmei Phom aser N. Tenkom Phom nungeri mezügbuba, tanabuba aser tasembuba jenjang angu.

Tetsür category nung C. Lingoi, Wanyong D. Phom aser Oyau Phom nungeri mezügbuba, tanabuba aser tasembuba jenjang angu.

Longleng nung tzünglu tzü bendena ayutsü indang awareness agütsü

Dimapur, Luroi/August 03 (TYO): Linük tesem ajunga nung Jal Sanchay Jal Bhagidari (JSJB) campaign ayongzüka kübok Longleng Town Council-ia "Catch the Rain" omen nung ajemdaker Rain Water Harvesting and Water Conservation indang awareness sentong ka August 3, 2026 nü Deputy Commissioner, Longleng indang Conference Hall nung ayongzüka liasü. Tzünglu tzü bendena ayutsü, tzü wazüka ayutsü aser tzü junga ketdangsuba nung nüburtemi shilem agitsü tongtipang lir ta angatdaksütsü nükjiding nung iba sentong ya ayongzüka liasü.

Sentong tenzüka mendenpuba Additional Deputy Commissioner Longleng, ThungchanbemoTungoe, NCS-i pela agizükba o jembiba den

tzünglu tzü bendena ayuba aser tzü kumzüka ayuba indang tongmelang agi lemsatapa liasü.

Shisalen sayur Junior Engineer PHED, Er. L. Baukham Phom-i Longleng ama tzü ajema aliba district tem nung tali rangloker tzünglu tzü bendenba yimya lemsatap.

District nung tzü agi anüngba tongtipang kuli kar pai rateta jembidang, nüburtem tenem kolak nung aliba, tzüpokdak tesemtem konga aoba, mongpu nung tzü source akongba, tzüngsang mopung aser tzünglu tzü bendena ayuba tesem peria maliba ajanga nüburtem tzü agi tali anüngaponger, ta ashi.

Item tebilemstü koktettsü asoshi arok-i shilem agitsü nüngdaker aser tzü ketdangsuba yimya shidak amshitsüla, ta pai ashi.

Pai sentepa alirtem dang meyi mapang tzünglu tzü bendena ayutsü ajungshi aser küm tepiyong tzü peria angutsü mechi tzü aliba tesemtem junga anepalutsü ayongzüka liasü.

Pai arem tuluba kundaksütsü nüngdakba, arem chidokba anentsü aser springshed management ama tzü kumzüka ayuba mera agia 'check dams' yanglua ali telung nung tzü tali bendentsü nüngdakba nenshia ashi.

Pai nüburtem dang kilem nung tzünglu tzü bendenba system inoktsü, kilentzü aoba lenmangtem müreka ayutsü, süngdong atemtsü, local water bodies kumzüka ayutsü aser tzü kanga anga amshiba yimya sübatsü ajungmesoa liasü.

Sentong tembanga EAC Sardar, Er. Vinho Swu-i melepzüng o jembia liasü.



Taoba Assam state legislative assembly nung AJP nungi toktepla Kunki Chowdhury den ketdangsür aser NGOs tem külemi lai Mon district nung alinen agi kongshir alir nem teyari oset bener arua agütsüba noksa ka yangi angur.

DC Kohima-i SIR atemasenden ayonger

Dimapur, Luchii/April 03 (TYO):

Deputy Commissioner, Kohima, B. Henok Buchem-i Special Intensive Revision (SIR) of Electoral Rolls indang senden ya August 11, 2026 anüngdang 11:00 ako nungi tenzüka Deputy Commissioner, Kohima indang Conference Hall nung ayongzüko.

Iba senden ya Special Intensive Revision exercise

dak sendakba nung ayongzüka lir, koba temsüa aliba senso ajunga inoka aser temsüa malirtem indoka electoral roll ochishia renemtsü nükjiding nung inyaker.

Iba senden nung Kohima Municipal Council indang councillors ajunga, Kohima kübok ward aser colony chairmen tem aser Kohima town indang GBs tem arua adentsü pai ayongzüko.



ADC Longleng, ThungchanbemoTungoe, NCS-i anir Longleng District Administration den District Disaster Management Authority (DDMA), Longleng ajanga Orangkong, Hamlikong yimtsüngtem aser Longleng Town Wards tem nung alinen agi kongshir alirtem nem August 1, 2026 nü jang o tzü teyari agüja liasü. Item teyari oset ya Lion's Club International Foundation ajanga tenlaa liasü.

DC Noklak ajanga SIR atema metetdaksür

Dimapur, Luroi/August 03 (TYO): Election Commission of India ajanga totuyuba agütsüba nung ajemdaker Deputy Commissioner, Noklak ajanga 01.10.2026 ta qualifying date sür Special Intensive Revision (SIR) 2026 of Electoral Roll agitsü atema metetdaksüko.

DC & DEO Noklak ajanga Booth Level Officers (BLOs) tem dang pei polling station kübok kibong ajunga semdangtsü aser tang aliba electors indang pre-printed details den Enumeration Forms tem August 16, 2026 nungi September 14, 2026 tashi lema agütsütsü metetdaksü.

BLOs temi Enumeration Forms tem verification asüba nung yarisemtsü atema electors temi tang tangokba passport-size noksa ka renema yua alitsüla.

ERO ajanga draft Electora Roll ya September 20, 2026 nü adoktsütsü, kong Enumeration mapang forms nung inoker agütsüba electors tenüng tem alitsü.

Metongshitsü aser temelenshi aliba tem September

20, 2026 nungi October 20, 2026 tashinung melenshitetsü. Notice Phase/Disposal of Claims and Objection ya September 20, 2026 nungi tenzüka November 18, 2026 tashi alitsü, aser iba mapang tesendaktep maliba Electoral mesüra tesüsaba Intensive Revision of 2005 indang Electoral Roll den sendaktepba mapang timtem ajurur tem ERO/AERO dangi Election Commission of India ajanga shia aliba documents tem bener arua ajurutsüsa akumtsü.

Iba dak sendakba nung Administrative Officers, Ward Authorities, Village Councils aser Booth Level Agents ajungai verification exercise mapang Booth Level Officers den yaritepa SIR sentong tem prokshitsü aser nüburtem dang kibok sema aruba mapang kidang alitsü asoshi ajungshitsüla.

Special Intensive Revision of Electoral Roll nükjiding ya temsüa aliba senso kata senzüka metoktsütsü aser metemsüba nisungtem Electoral Roll nung meinoktsü asoshi lir, ta metetdaksü.

ARi Dimapur nung counselling sentong ayongzük

Dimapur, Luroi/August 03 (TYO): Assam Rifles temi Rubaru sentong kübok Dimapur nung kibong tem asoshi counselling sentong ka ayongzüka liasü.

"Mera Wajood, Suno Meri Awaaz" omen nung ajemdaker iba sentong ya counsellor Dr. Vandini Setia-i agua mit azüokba onük nungi jembia liasü.

Iba sentong nung kibong 31 deba psychological counselor den sensaksemba ajanga parnok tajangzük ngua liasü.

Rubaru kübok ita shia Assam Rifles kibongtem asoshi iba sentong ya ayongzüker. Rubaru counselling session yagi "Mera Wajood" tanüla tali jangjaa Assam Rifles kibongtemi shilem agiba benjonger, ta sangdong ka ajanga ashi.

Bankipur nung Prashant Kishor-i BJP candidate madak takok angu



Patna, August 03, 2026: Hombarnü Jan Suraaj Party tongti, Prashant Kishor-i Bankipur Assembly by-election nung takok anguba sülen party nung inyaktertem den külemi benjungtepba noksa nung angur.

Patna, Luroi/August 03 (Agencies): Jan Suraaj Party tentetsang, Prashant Kishor-i Bihar nung Bankipur Assembly by election nung BJP candidate madak takok nguogo.

Tesüiba küm 35 tashi iba constituency nung BJP MLA tem liasü.

Prashant Kishor-i BJP candidate Neeraj Kumar Sinha madak vote tali 19,324 agi takok angu. Kishor-i vote 64,151 angu, Neeraj Kumar Sinha-i vote 44,827 angu aser RJD candidate, Rekha Gupta-i vote 14,273 angu.

BJP lenir Nitin Nabin Rajya Sabha nung shimba sülen pai Bankipur menden ya azüngtetsüba ajanga by election agitsüsa aküm.

By election atema BJP aser RJD nati election nüboyim metenzük dang Kishor-ibo ita ana jelia nüboyim tenzüker liasü. Kishor-i tesüiba ita ana tashi constituency tesem ajaklen lokti senden ayongzüka agi, kibok

sema senzü aser booth-level organisation tashi itshia liasü.

Election nüboyimba mapang piyong Kishor-i, taruba by-election ya "Samrat Choudhary-i aniba sorkar atema referendum ka asütsü" ta metetdakja liasü.

Mapa manguba tebilemtsü, shisaliok aser ketdangsüba onüktem nung ajemdaker pai nüboyim; talisa pai tang mezüng vote agütsüsupurtem aser Gen Z voters dak rangloker nüboyima liasü.

Ano külen BJP-ibo nüboyimtsütsü atema star campaigners 40 yoka liasü.

Hombarnü osangbenertem den jembidang Kishor-i, "Iba takok anguba sülen onok atema mezüngbuba teinyaktsüji- onok dak tamang kateta moatsüba atema onoki Bankipur nung alirtem nem akhüm agütsütsü. Bankipur nung temelenshi alitsü atema onoki meranga inyaktsü. Taruba ita ana-aseem tsüngda nenoki temelenshi angu

tenzüksü," ta metetdaksü.

Kishor-isa, "Ni MLA ka ama khen nung Bankipur ya Bengaluru ama mekümdaktsütsü, saka taruba ita ishika tsüngda temelenshi aliba nenoki angutsü," ta ashi.

Kishor-isa, "Bankipur nung alirtemi BJP lenirtem nem osang tejangja ka sangoktsüogo: 'Yimlibilema Bihar Chief Minister ya nisung tajung ka shimmang' Tetemsü aser tindang nisung ka shimtsüla. Kechi südir süaka Bihar tejakleni aotsüla," ta metetdaksü.

Ano külen Bihar BJP Tir, Sanjay Saraogi-i, "Tamakok anguba kuliji onoki asadangtsü. Onoki Bankipur nung terenlok atema inyaka aruogo aser tarutsü nunga maneni inyaktsü. Bankipur nung alirtem ya ozü nisungtem. Onoki vote ishika dang angubaji angatetsü atema jungjunga asadangtsü," ta metetdaksü.

Odisha nung medical PG exam paper leak asüba bushisüngdangtsü

Bhubaneswar, August 03 (Agencies): Berhampur nung aliba MKCG Medical College & Hospital nung exam paper leak asüba bushisüngdangtsü atema state Health & Family Welfare department-i züngsem aseme akümba committee ka tentetogo.

Health & Family Welfare department-i sangdong ka ajanga, high-level committee jagisa iba exam ketdangsüa agiba Odisha University of Health Sciences (OUHS)

anema-a bushisüngdangtsü, ta metetdaksü.

Committee dang hopta ana tsüngda report agüjang, ta sorkari tuyuogo.

Committee nung züngsem asemji Health & Family Welfare department nung additional secretary Bijay Kumar Dash, special secretary to government Bijay Kumar Mishra aser joint DMET Anil Kumar Sahu nunger lir.

Postgraduate (PG) examination tagidak mapang

nung nisung kari question paper noksaji tangokba sülen phone ajanga lemsatop, aser ibaji examination ketdangsüa agiba tsütsü tamakok ka lir, ta kasa osang ajanga metetdaksü.

OUHS-ia exam ketdangsüa agiba tsütsü tamakok aludaktsüba atema MKCG Medical College & Hospital dang anogo ana tsüngda telangzüba agüjang ta tuyuogo.

Iba dak alia MKCG MCH aser nija medical college ka anema FIR benokogo.



August 03, 2026 nü Tamil Nadu kübok Madurai yimti nung gari ana tsüktepba sülen tangokba noksa nung angur. Iba lendong nung arishi küm 3 tetsür chanu ka densema nisung pongu asü.

Jabili Development Corporation Limited

(An Undertaking of Ao Senso Telungjem, Dimapur)
Senden Reju, Purana Bazar, East Dimapur-797112
Phone : 98635 66932. Email : info@jdcl.co.in

Date : August 03, 2026.

**AOTSÜR AOR NEM JDCL SHARE
ALITSÜ LAPOKTSÜR**

Nagaland aser bendang tesem balala nung alir Aotsür Aor ajaki tanü nungi JDCL nung share alitsü akoktsü ta Jabili Development Corporation Limited (JDCL) office ajanga sangdonger.

Share alitsü purtemi 'verification aser approval' atema pei meyong KYC JDCL website www.jdcl.co.in nung agüjangma. Aser nüngdakra website nung agüja aliba JDCL Nodal Officers mashi ka den tongtepratepangma.

Iba Share alitsüba mapang ya 30th September 2026 anogo tashi lapoka yutsür.

Sd/-
Executive Director,
JDCL.

Tamareneri pa indang degree sayutsü asü?: Abhijeet Dipke

New Delhi, August 03

(Agencies): Cockroach Janta Party (CJP) tentetsang, Abhijeet Dipke-i Hombarnü BJP lenirtem dang, nenoki nenok indang educational degree yimjak nung sangdongtetsü asü? ta asüngdang.

Dipke bendanglen azüngba dak sendakba nung osang tejangja meshia RTI ka benoka lir.

Dipke-i, kü shisaliok dak sendakba nung ni documents ajak sayutsü melunga lir, ta ashi.

"BJP nung inyaker kati ni anema RTI benoka lir. Ni parnok dang ya asüngdangner; ner lenirtemi parnok degree sayutsü asü? Ni kü meyong scholarship documents aser educational records ajak sayutsü melunga lir," ta pai metetdaksü.

Dipke-isa X ajanga, "Kü scholarship shidi aser education loan shidi ni sayutsü. Tamareneri pa indang degree sayutsü asü?" ta asüngdang.

Surat yimti nung aliba RTI activist kati, sorkar mapa nungi

anisüngzüker alisang- Dipke tebui kodaser par jabaso US nung züngdaksütet? ta asüngdanga RTI benoka lir.

Iba dak sendakba nung osangbener den jembidang Dipke-i, "Ni mimshitsüsa kecha mali. Scholarship aser education loan ajanga ni bendanglen azüng," ta metetdaksü.

Dipke-isa, "Ni Boston University nungi scholarship angu aser tanüngba senotsüji education loan anguba liasü," ta metetdaksü.

Arrshi küm 30 Dipke-i Boston University nungi Public Relations nung Master of Science degree renema liasü.

Taküm May ita tomten pai Cockroach Janata Party tentetba sülen NEET-UG paper leak asüba anema longkak aittsü atema taküm June ita nung pa India-i meyipa aru.

Anogo aika Cockroach Janta Party leniba nung kaketshirtemi Jantar Mantar longkak aita aruba sülen Education Minister Dharmendra Pradhan-i menden nungi anen.

Lok Sabha nung SC (Number of Judges) Amendment Bill agizük

New Delhi, August 03

(Agencies): Hombarnü Lok Sabha nung Supreme Court (Number of Judges) Amendment Bill, 2026 agizükogo; tang Supreme Court nung judges 33 tashi lezmükja aliba nungi 37 (Chief Justice of India mezüngsem) akümtsü nükjidong nung amendment bill ya benoka liasü.

Lok Sabha nung opposition-i NEET paper leak asüba aser Ayodhya nung Ram tekülem ki tenla ayuaba ken otem nung ajemdaker longkak aita yimyim ayimba mapang nung iba bill ya agizük. Iba bill ya maneni Rajya Sabha nung benoktsü.

Union law minister Arjun Ram Meghwal-i iba bill benokba sülen Chairman-i o jembitsü atema MP tem nem

temelaba agüja liasü, ajisüaka opposition züngsemtemi maneni longkak aita ayimdenba agi voice vote ajanga dang iba bill agizük.

Supreme Court (Number of Judges) Amendment Bill, 2026 ji agizükba sülenbo anogo piyong atema senden thinena liasü.

Taküm May 5 nü Union Cabinet-i Parliament nung Supreme Court (Number of Judges) Amendment Bill, 2026 benoktsü atema telemtetba agia liasü. Iba ozüng ajanga Supreme Court (Number of Judges) Act, 1956 melentsü.

Sorkari ashiba agi, Supreme Court nung judges teimba akümba ajanga maparen ajak tashi itta inyaktsü aser ken otem tekeraba nung bentettsü.



TIR YIMYIM YIMOBILEM (EDITORIAL)

DIMAPUR TUESDAY, AUGUST (LUROI) 04, 2026

Ibai o agi mapa akümtsüba mapang!

Tesangwa ya amang nung dang nüngdaker, anungji amang marura tesangwa menügdaktsü. Aji oda, kechikomaka amang tulu aser tanak kuma arudir, iba tetkaji tesangwajia tulu aser tesashi nüngdaker. Ibaji mesüka Assembly election nung pei lima aser nübortem asoshi aria bilema inyaktsü asoshi jembiba otem to tang ama tzümtsüng aser anentsü agi nübortem tesama aser takoksa tulu ajurur shisaboluseta alidang mapa kuma inyaka sayutsübaji mapang tajungtiba lir. Nübortem peria alidang teyari agütsübaji amajok dang, kechiyong teyariji kobatetka agütsüdir agütsüaka tenük masüngtsü. Aji oda, junga alidang aser peria alidang teyari agütsüba jagi nüngsang masü nüngsenang tali ajangzüksü. Ibaji mangatet ser government nung yimsüsür aser ketdangsertemi nübortem timmatem ayongayonga alidang, terenlok mapa inyaktsüba sen agi angati sen kümer lema agütsür aser iba senji shitak terenlok mapa nung amshio go ta sayutsü atema yimsüsür, ketdangser aser nübortem ajak temulung ka ser tiyazü mapa ka tenüng agütsür. Ibaji tesümgangtsüka lir, kechiyong yimsüsür, ketdangser aser nübortem ajunga lungjemer tiyazü mapa inyakba tenüng nung sen agizüka achitsü bangjemba lima aser nübortemji nüchibo masü, ano shiruru jenjang nung lir. Tang ama item shirurudem dangi alima lendong arudang, asateptsüba dak alaka tejenokdak maka aser teyari arulen mali, tagitsü ajak tiyazü mapa inyakba tenüng nung chiadoker peisasa pei kangshitsüsa akümer. Iba ama shiruru kolok aser mulungsentsü adenba purtem asoshi tang ama alima lendong agi timtem tekangshi ajuruba mapang ya, ochi o aser ochi mapa dangi meyiptsüba mapang lir. Aji oda, nübortem asoshi tan asütsüba mapang aser constituency shia nung MLA shia asoshi o agi mapa kuma inyaktsüba mapang tajungtibaji tang tzümtsüng agi ki aser alu ajanga atsüngbanger alidang, anentsü agi ki dena anenzüka orr aser tesem ajaklen gari lenmang maka kümer nübortem timtem tia ajuruba mapang ya asütsü. Iba timtem yabo Relief jang aser Relief sen terara lema agütsüba agi meküpdoktsüla, saka manger sangwa nung nübortem nüngdak asoshi gari mejajatetsüsa alibaji lapoktettsüla, apu maka ponger orr alibaji yanglutettsüla, school kitem raksar alibatemji yanglushitettsüla aser nübortem kiojen mala alirtem nemji tejenokdak agütsütettsüla. Itemji government mapa nung alirtem mapa lir. Aji oda, tang ama alima lendong tsüdong mapang, government-i nübortem meküzmzüktetra government alibaji nüngdak maka akümer. Tang yabo tiyazü mapa ka tenüng agütsür senbo party pur lema agitsüba mapang masü, mesüra yimkong tenüng nung tenüng agi mapa tilaka inyaker tata-tainer lema agitsüba mapanga masü. Ibai shitakba o agi mapa kuma inyaktettsüba yimsüsürtem asoshi, amang agi sangwa kuma, shitakba mapa inyaktsüba mapang lir. Yashi tashi asenoki lenmang yangluba, apu atemba, office lapokba, aluyimba, school aser mozü kitem anepaluba mapa aser osang ajak file sünga tiyazü aser tiyazü dang nemdena liasü, saka tzümtsüngbo tiyazü maru, anentsüa tiyazü malu, apu maka akümbajia tiyazü masü aser lenmanga tiyazü meraksa. Aji oda, tanü asenoki ngua asenok akoksatsüsa raksaba ajak ya asangsang nung shitak ataloker, anungji itemji asangsang nung asenok teindang shisatsü aser ochi mapa agidang yanglushitettsü. Aji oda, election mapang asenoki jembiba o to mamai lira, ibai mapa akümtsüba mapang lir aser terenlok otsü masü sen otsü dang jembia lira, nübortem asoshia kanga junga bilemdangtsüba mapangji tang ya lir.

OLEMSABANG

ASEN MEYONG SENMANG ASE SASA MESENMETO MASÜTSÜLA

~ L. Kika Pongener

Aor-ji tashitemeteter aser tejakleni aoba kin ta Naga nunger tangar kin ajungai akümtsübur. Naga nungeri dang masü; alima kin ajungai Aotsür Aor memeteter mali; Ao kinji bendanger (Foreigner) kintem-ia metetba kin ka lir. Ajisuaka, kanga tesasatsü-ka; tanübo asen Aor-i asen sasa asen senmang mesenmetor. Laishiba nung züngdangra....Esau-i aya marem chi auso ka yong pei tambu senmang (Birth-right) ayokba angur (Lipok-25:30-34). Esau-i pei tambu senmang chi auso ka yong ayokbaji; kanga-sa mebilemdangi inyakba mapa ka liasü. Khen aya maremba agi arishi tepiyong asoshi pei tambu senmang ayokbaji kanga-sa tamashi mapa ka liasü. Ajisuaka, Esau-i pei tambu senmang ayokba denji kecha tepila mali....Tanü Aotsür Aor-i asen tsüraburi alangzüka yutsüba senmang asen sasa mesenmetor. Naga nunger kin ajak rongnung adianu tambusang ama; Naga nunger kin ter-teroksangeri akümtsübur....Iba konang-naroküm senmangji tanü asenoki aahzüka masü....Asen tsüraburi alangzüka yutsüba senmang lir. Otsüla oboula nungeri mezüng tamang yimsu agizüka nuji aküm; aser Naga nunger tangar kintema nuji kümdaktsü. Otsüla oboula nungeri Ao kinji; mapa meranga inyakba kin aser ochishir kin ta tenung tajung alangzüka yutsü. Ajisuaka, tanübo Aotsür Aor teimba ka azümesen aser ochimashiba kin kümogo. Tanü asen Aotsür Aor-i asen jaklaliru mazüok, shi-azü mazüok aser libaliru majungba ajanga aser ochimashi rongsen-yong; iba konang-naroküm senmang tajungji yoka achir. Tanübo Aotsür Aor tangar kintem dang numa-madangtsüsa tetla-tetshiba kin ka kuma odagi.

Aor-i jembia aruba....Nisung ka kodang sudir asüyim (Tipu lima)-i aor; aser asüyim matongdang len tom nung 'Longer-tzü' ayong nung teka metsüker; aser longer-tzü ayong nungjagi akümlir o asür na pilar ta jembir. Asür metenlar otsü ka....Nisung ka pa adianu suogo ta jepa asüyimi meiner ao....Saka kodang longer-tzü ayong tonger idakji teka metsük...Idangjiang pa adianu asü masü pa-ang asüa....ta meteta aküm. Iba otsü-ji mesuka....Tanü asen Aor tia reprangdangra; Aor-sa meputepba yimer o yimer, kidong o kidong aser adianu o adianu tsüngda nung; kati ka majinur, tenukmeremteper, arishiteper, tsükchiteper aser kati ka atsüzüktsü meranger. Asenoki kanga junga meshisadangi adianu o adianu tsüngda kati ka dak tamajung inyakteper aser kati ka jenjang raksatsür....Aser aji tangar kar jenjang raksatsür amai bilema inyaker....Saka ibaji tangar kar jenjang raksatsür masü; asen meyong senmang aser arok meyong yimli raksar ta meshisadanger.... Saka kenubo ni raksaba-to tangar meyong raksa masü....Ozü tsüraburi alangzüka yutsüba arok meyong yimli aser senmang ni kü sasa raksa-a ta kanga sasatsü....Saka kanga-sa menuatoker alitsü. Tanü asen Aor timsüsür, lennir aser senso tajung aikati sen-yong aser supokrem-yong ochi ayoker aser asen tsüraburi alangzüksüba yimli aser senmang asen sasa sensamasa-a mesenmetor. Esau-i aya marem chi auso ka yong tambu senmang ayokba ama....Aotsür Aor kari sensak marem pei yimli ayoker; ano karibo tangari 'kibur-kümja' sanga jembiba nung akoseta pelaseter....Pei sasa tetsü-teboui alangzüka yutsüba yimli aser senmang akotoka-atokba karbo lir....Ajiser, aji pei sasa pei jenjang raksar ta meshisadanger.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

WCC-i Iran dang Arogo meyong kiojen meyipa agüjang ta mepishir



Iran yimtiba, Tehran nung aliba St Peter Evangelical Arogo Tenla ki noksa nung angur.

August 03, 2026: Tawa Iran linük yimtiba, Tehran nung küm 150 tejaklen asüba Tenla ki aser Arogo meyong ali-kiojen sorkari agiadokba atema World Council of Churches (WCC)-i Iran sashia aitsüba den külemi sorkar ketdangsertem dang Arogo kiojenji tanaben meyipa agüjang, ta mepishiogo.

Iran nung ketdangsertemi St. Peter Evangelical Arogo Tenla ki aser Arogo kiojen ajak agiadokba den külemi ali acre 10 nung aliba Khristan kibong 20 meindokogo.

Khristan kibongtemji Assyrian aser Armenian lisopurtem lir.

Arogo indang compound nungjisa kiojen den school ana, Bible Society indang office aser Council of Evangelical Churches of Iran indang office tem lir.

WCC General Secretary, Dr Jerry Pillay-i, Tehran nung ketdangsertemi Arogo meyong kiojen ajak agiadokba atema onoki tebilemtsü akar, ta

metetdaksü.

Dr. Pillay-i, "Arogo kiojen agiadokba aser Khristantem meindokbaji tamangba yimsü temeden anema lir, aser iba ya Iran nung akhidang nungi aliba Khristantem aser nüngshi kiojentem amokmerenba lir," ta metetdaksü.

Dr Pillay-isa sorkar dang Council of Evangelical Churches in Iran nem tanaben Arogo kiojenji meyipa agüjang aser Khristantemji tanaben arua lidakjang, ta metetdaksü.

"WCC-i Council of Evangelical Churches of Iran aser takoksa angurtem ajak nungiter. Iba denji külemi international meimchir temeden ozüng kübok Iran ketdangsertem dang meimchir temeden, yimsü temeden aser minorities temeden wazüka ayutsü atema inyangang ta mepishir," ta WCC-i metetdaksü.

United Nations nung mongintemia Iran aitsüogo. Parnokisa, Arogo compound nung aliba

Khristan kibong aika jena oadokogo; parnok teimbaka sensakertem lir, ta ashi.

"Ketdangsertemi tuyuba ama meinyak nungbo aputsü, ta Arogo nung lenirtem amokmerena liasü. July 12 nü Arogo compound nung alirtemji ajak tetsübu nung ki toktsür oadokogo," ta parnokisa metetdaksü.

UN-i ashiba agi, Iran nung Protestant Arogo 50 shi liasü aser item Arogo teimbaka nung Persia oshi nung tekülem sentong agia liasü. Tangbo item Arogo teimbaka mali aser kar anünga aliba nungjia Persia oshi nung tekülem agiba anenadokogo.

Alima nung Khristantem alitsü atema linük tamajungtiba 50 rongnung Iran ya jenjang 10buba nung lir (Open Doors' World Watch List).

Iba linük nung Khristantemi reshikangshi kanga ajangashir, talisa Islam yimsü toktsür Khristan yimsü agizükertemi reshikangshi kanga ajangshir.

ANOGO ABEN TSÜNGREM DEN

KÜMDANGA SHISA KAA
TAZÜOKBA NUNG JAJANG

"Anungji nenok koda jajar kümdanga reprangang shisa makaba ama masü saka shisa akaba ama jajang".

~ Efesa 5: 15.

Asenok ajak asoshi tongtibang kaji kümdanga jajatsüla kechiaser shiba kümdanga jajar pei takümjia azüokteter. Ano taküm ka nung tazüokba melira pei asoshi tebilemtsü, tamakok aser lendong nung lir ta bilemang. Atangji, tazüokba taküm ka jagi, pei jenjang tongteter aser Tsüngremer alizünga alangzüker saka mazüokba taküm ka jagibo temenen den angang jajar aser pei sasa pei jenjang raksar. Khristan ka ama asenoki Tsüngrem temeim agi asenok takümji azüoktsüla aser iba tazüokba nem ya anishitaktsütsüla.

Shiba Tsüngremer tazüokba nem anishidaktsür parnokjibo teti temeim tashi agi len anir aser pei sasa temoatsü ajangzüksü. Yisu Khristai asenok asoshi Pa taküm kangki nung bendanga agütsüba temeim ya asenoki chichia angateta agizüka lira, na aser ni jajaba lenmang nungji teti takok nung jajatettsü. Kechiaser shiba tamang nung jajar parnoki alizüngzüngji atongtsü. Anungji, bendanga agütsüba temeim nung jajatettsüla, kechiaser iba jagi Khrista jakla sayur aser asenokji Pajilu benshir ka alitsü.

Atangji asenoki Tsüngrem temeim nung azüiter asen takümji jajara, iba lemanang nung yabo sempaba mali, merumeru mali, mesütepi amashiba mali, aser mezümekümba mali. Saka, kadi ka meimtepba, anepbaluba, yaritepba aser temeim sayutepba lenmang aseni ajurutsü aser teti tatem makaba lenmang pei sasa tazüokba nung jajatsü.

SARASADEM:

Oba Tsüngrem, anogoshia, onoki kanga kümdanga, reprangshia jajatsü ne leniba tashi apulokjangma. Amen

Maharashtra state nung anti-conversion ozüng benokogo

August 03, 2026: Maharashtra state nung anti-conversion ozüng benokogo; India nung anti conversion ozüng benokba state 13bubaji Maharashtra asütsü.

Khristan lenirtem aser meimchir temeden atema inyakertemi, iba ozüng ya nütsüng ajema aliba Khristantem aser Arogo rejutem anema amshitsüa akok, ta metetdaksüogo.

Linük Tir, Droupadi Murmu-i sign süa agizükba sülen July 30, 2026 anogo nungi Maharashtra Freedom of Religion Act, 2026 benokogo.

Iba ozüng kübok mesüzüka, ashikülak mesüra kangshia yimsü meyipdaksürtem küm 10 tashi tepuokdak ayutsüa akok.

Iba dak alia iba ozüng kübok tamangba yimsü

meyipnertemi anogo 60 jelia district ketdangsertem nem osang metetdaksütsüla. Yimsü meyipba sülen anogo 25 tsüngda sorkar nem osang metetdakja register asütsüla.

India nung nütsüng teimba aliba state tem rongnung tanabuba jenjang nung aliba state, Maharashtra nung Arogo nung lenirtemi, tamangba yimsü meyiptsüji nija ka temeden lir, ta metetdaksü.

August 01, 2026 nü Archdiocese of Bombay-i sangdong ka ajanga, anti conversion ozüng benokba state tem rongnung Maharashtra-a densemogo; item ozüng ya aiben ozüng alema inyakertem nokdangtsü atema masü saka nütsüng ajema alirtem anema hadir ka ama amshir, ta metetdaksü.

Archdiocese-isa, state

balala nung anti conversion ozüng ajanga Khristantem takoksa angur aser yimsü balala amanger apuanitemi timtem ajangshir, ta metetdaksü.

India linük tesem ajak nung anti-conversion ozüng benoka mali, ajisüaka tangbo state 28 nungi tesadang nungbo iba ozüng benokogo.

Archdiocese of Bombay nungi otongdar, Nigel Barrett-i, "tashiyim amshiba, ashikülak aser mesüzükba" orentemji jungjunga rateta mali, aser iba ozüng kübok Arogoi lapokba shisaliok rejutem healthcare rejutem anema inyaker, ta ashi.

August 1 nü osangbener den jembidang All India Catholic Union (AICU) otongdar, John Dayal-i, "Iba ozüng ya linük temzüng alema lir, kechiyong linük temzüng

ajanga yimsü temeden ka lir, ta metetdaksü.

agütsür," ta metetdaksü.

Paisa, iba ozüng ya tim masüba nung mamshidaktsütsü atema principal aser Jesuit putir, Bombay Catholic Sabha-i iba Frazer Mascarenhas-i, ozüng ya mita atatsü, ta metetdaksü.

Lawyer aser Watchdog Foundation trustee, Godfrey Pimenta-i, tashiyim amshia mesüra mesüzüka mesüra ashikülak ajanga yimsü meyipdaksüba nokdangbajibo tim dang, ajisüaka iba ozüng yagi linük temzüng nung aliba yimsü temeden anema meinyaktsüla, ta ashi.

"Iba ozüng ya shidak benoktsüla, teladak asütsüla aser linük temzüng kübok benoktsüla. Tim nung pei sasa melungteta yimsü meyipbabo menokdangtsüla aser yimsü temeden wazüka ayutsüla," ta paisa metetdaksü.

Pakistan rally ka nung bomb pokloktsü; nisung 19 asü, 55 yiru



Kabal, Luroi/August 03 (Agencies): Pakistan north-west tsütsü Khyber Pakhtunkhwa province nung Deobarnü telungpur anema yimjung nung rally ka ayongzüka alidak takum bendanga agütsür bomb pokloktsüba lendong nung police trok densema nisung 19 asü aser 55 yiru.

Iba lendong ya Swat Valley kübok Kabal jila nung atalok, kong longkak aiterkem police station ka anasa adenshir telungpur anema yimyim ayima aser yimjung asoshi takhangba agütsüba mapang atalok.

Ketdangsür temi ashiba agi, longkak aitba mapang suicide

bomber yagi Kabal Police Station telungi aittsü merang.

Nisungba ya station telungi maitdang duty nung aliba police temi pa soit. Iba sülen tapoktsü oset ya police station gate aser Kabal Chowk anasa pokdaksü.

District Police Chief Omar Khan-ia longkak aitba mapang bomb ya pokdaksü ta shiogo.

Mapang tatsüka lir ketdangsür temi nisung tekolak ka ngutet, koba suicide bomber indang asütsü südi ta amanger.

Tang tesüsa osang aruba nung asür ya 19 jungogo aser yangji police trok dena lir ta ashir. Iba lendong nung nisung 55 yiru aser parnok anasa aliba mozüki tem nung anir oa

anepalutar.

Khyber Pakhtunkhwa provincial emergency service odongtar Bilal Faizi-i nisung 14 shi tepset aser aika yiru ta shia liasü. Mapang tatsüka lir asürtem timba akum.

Lendong atalokba den külemi rescue and emergency teams arua yirur alirtem anizüker ao aser tesem ya mekabanga ayu.

Police station anasa yangji aliba lanurtem telungpur anema longkak aitba mapang iba lendong ya atalok. Lendong atalokba sülen security personnel temi iba tesem ya mekabanger bushisüngdang tenzüko.



United States of America linük anüolen Washington state kübok Spokane tesem nung morokmi adoka August 2 nü West Tiffany Avenue nung ki o jen rongdoker aliba noksa ka yangi angur. Tang US tesem balala nung morok mi adoka nüburtem kanga timtemba mapang lir.

Myanmar nunger lenir Aung San Suu Kyi-i Red Cross ketdangsür ajuru

Yangon, Luroi/August 3 (Agencies): Myanmar nung sota aliba taoba lenir Aung San Suu Kyi-i Hombarnü Red Cross indang International Committee den ajurute-pogo. Arishi küm 81 tain Nobel Peace Prize ngur alila health koma ali iba indang küm aika shingaia memeteti ashishia aruba sülen tang lai Red Cross ketdangsür den ajurute-pogo.

Suu Kyi ya 2021 küm February ita nung sota yua lir. Lai aniba civilian sorkar ya Myanmar military-i atsüngtokba sülen la sota liasü, aser iba ajanga south east Asia nung aliba iba linük nung mepetmesü tenzü, koba tang tashi mesüngjemteti lir.

Iba sülen Suu Kyi ya kong ali, mesüra la temang koma ali iba indang mejangjai aruogo, kechiyong bendanger lenirtem mesüra envoy temi la den yimjak nung khien danga ajurutepdanga mali.

Hombarnü Suu Kyi-i, International Committee of the Red Cross (ICRC) Resident Representative, Arnaud de Baecque den Myanmar yimtiba

Naypyitaw nung ajurute-pogo, ta sorkar otongdar Khine Khine Soe-i Telegram message ka ajanga metetdaksü.

ICRC-ia sangdong ka ajanga parnok lenir kati Suu Kyi den ajurute-pba metetdaksüogo, saka shibai pa den ajurute-p iba indang osang tejangja magütsü.

"Nüjiso maliba nisungtem ajurutsü atema ICRC indang inyakyim dak ajemdaker la den ajurute-pogo, kong Aung San Suu Kyi kija den ajurute-pa jembitsü asoshi maongka densema lir," ta ICRC-isa metetdaksü.

Iba amala semdangba mapang nüjiso maliba nüburtem nem parnok kinungertem den osang lemsateptsü asoshi maongka agütsür, ta kasa sangdong ajanga metetdaksü.

Sorkar otondagi lemsatepba noksa pezü nung Suu Kyi ya Burma tsür sobaliba sobosolemtsü semer Baecque den takdang ka nung ajurute-pa sensak asemba nguogo.

Tanga noksa ka nung birthday cake ka nung la tenüngen ajenoker Suu Kyi-i lemya aliba nguogo. Iba ya lar ki asütsü ta

bilemer kechiyong noksa tesülen süoshi ayuba aser oset bendena ayuba bongdang balala yua aliba nguogo.

Noksa pezübuba ya cake indang noksa ka liasü, kong "Happy Birthday Aunty Suu 19.6.2026" ta zülur liasü.

Military-i sorkar atsüngba sülen Suu Kyi anema ken o aika benok aser la ochi mashi inyakyim, election nung aibelenba aser state indang mim temzüng ozüngen aibelenba atema aija küm 33 tepuokdak ayutsü obendang agütsü.

La den sendaktepa alirtemi la anema ken o benokba ya yimden yimsüsüba dak sendaka lir aser la linük yimsüsüba nung shilem magidaksütsü atema jenjang agiba lir, ta ashir.

Ajisüaka la küm 33 tepuokdak ayutsü obendang agütsüba ya mapang tatsüka lir küm 27 kümtsü aser April ita one-sixth agi tajemba kümtsüogo, anungji la küm 18 dang sota ayutsü.

Suu Kyi'er jabaso Kim Aris-i taoba küm December ita ashiba agi, lai tetsü health indang osang tejangja memetet

United States den jembishinü masür: Iran

Dubai, Luroi/August 03 (Agencies): Hombarnü Iran-i United States den jembishinü masür aser senden amentsüa sentong kecha mali ta ashir, anungji US Tir Donald Trump-i amakba soita ayuba kuli agüja nikongdang senden amentsü ta ashiba den meputeper.

Tesüiba ita pongu ataloka aruba kasa, hopta tatemlen Trump-i Iran dak kanga sashia amaktsü sentong sangdong aser mapangtong nung athi.

"Ni tezüngzüktep ka yanglutsü na? Ni nisung tepsettsü meranger masü," ta Trump-i Deobarnü Air Force One nungi ashir.

"Tang asenoki inyakbaji parnok den jembitsü akaba ya lir. Ibaji asüngen nikongdang tenzüksü," ta pai tesem mesüra shilem agitsüpur mesangdongi ashir.

Iran Foreign Ministry odongtar Esmail Baghaei-i ibaji magizük aser United States den jembishinü makar aser senden amentsüa sentong mali ta ashir. Iran-i bendanger jaoka jembishinütsü mesüra bendang limai jembishinütsüpur yoktsü sentong mali, ta pai ashir.

Foreign Minister Abbas Araqchi tang Iraq nung temeshi ainlen jajaba dak alaka Iranian negotiators ajunga linük nung lir, ta Baghaei-i ashir. Tang jembishinübaji Oman den Strait of Hormuz ketdangsütsü atema kisüngen lir, ta pai ashir.

Hombarnü osang ya Trump-i Israel den külemi ita pongu jakdang "Operation Epic Fury" tenzüker atalokba sen sako lir. Aiben Trump-i mitkar nem

makdaksütsü amokmeren aser jembishinü akaba mechi atsüanem akar ta shia aru.

Ajisüaka rara tembangtsü nükjidong nung June ita memorandum of understanding zülute-pba July ita tetenzüklen raksaba sülen Iran-i yimjak nung Washington den jembishinü akatsü memulungi arur.

Rara tenzükdang Trump-i nükjidong ayuba tang tashi metongteti lir aser aji Iran indang nuclear programme raksatsü, region nung tsükchir dak amaktsüba tashi azüoktsü aser Iran nungeri par putir yimsüsüba atsüngdoktsü tensa yanglutsütsü lir.

US-i amakba nung Iran-i telangzüba tesashi agüja region nung US sepaitem, Gulf nung Washington tembar linüktem aser rong tem dak amaker, aser tatem nung Trump ang atsüngzüka aor.

Atsüte-pba nung Strait of Hormuz ken o ya tiyong lir. June ita memorandum zülute-pba ajanga Iran-i iba tongtipang lenmang ya lapoktsü nüngdaker ta Washington-i ashir, saka Tehran-i tezüluba nung rong senzüba ketdangsütsü tashi par nem agüja lir ta ashir.

Anungji strait nung rara metenzükdang aliba dang nungi tang tashi tuluba Tehran nem yutsütsü, koba Trump asoshi tetsükdaksü tulu ka alitsü.

Tang tashi Iran-i iba tzü lenmang nung soita aliba United States-i mesalatsüteter, anungji alima nung totzü jenjang tasakba kumdaksür.

ali aji jangjatsü ta ashir.

Ajisüaka military-i teyari agütsüba administration-i Suu ?Kyi den ajurutepdaksütsü nongnanga arudar, kong Philippines-i May ita ASEAN special envoy ka nem la den ajuruteptsü atema temelaba agütsütsü mepeshiba densema lir.

Suu Kyi ya linük asoshi nüjiso atema rarar General Aung San'er jala lir, aser la ya taoba junta-i küm15 tashi Yangon kübok Inya Lake nung lar kidang sota yua liasü.

Myanmar nung military-i sorkar atsüngba sülen nüburtemi longkak ait tenzüker aser military-i item longkak aiterkem tashiyim agi azüoktsü merangba mapang azütokshi lendong tulu ataloka nisung aika taküm sama aser aika pei talidak kitoktsür jenshia aotsüsa aküm.

Maneni taoba civilian sorkar kübok lenirtem aser activist tem aika ken o balala nung tepuokdaki yokogo, kong karbo taküm tepeyong tepuokdak ayutsü atema obendang agütsüba densema lir.

CWG nung medal angur nem takaraba nung senpet agütsütsü



Luroi/August 3, 2026

(Agencies): Taoba mapang inyakyim ama masü saka medal angurtem nem linüki meyipa aruli senpet agütsütsü atema India sorkari jenjang agidar.

Tang tashi nung asayartem inyakyim balala tembanga inyaksü atema prize money agizüksü asoshi ita aika atatsüsa aküm.

India sorkar den sendaktepa Sports Ministry-i, CWG 2026 nung medal angurtem nem menomeyang mesüi senpet agütsütsü asoshi inyaktepda.

Taoba mapang medal angurtemi senpet magizük tsüngda kuli kakat aika agütsütsüsa aküm aser iba den administrative formality aika tembanga inyaksü nüngdaka liasü. File tem ya jenjang balala nung asadang aser department balalai agizükba sülenang tatembangbuba temelaba

agütsütsü asoshi Sports Minister tonga liasü, aser iba inyakyim atema ita trokbosa agia liasü.

Sports Minister Mansukh Mandaviya shimba sülen ministry-i, teyongtsü nung inyakyim kar paitoktsü atema jenjang agiogo.

Ketdangsürtem dang medal angurtem indang osang tejangja jelia asadanga atatsü aser senpet agütsütsü atema takaratiba nung inyaksangshitsü tetuyuba agütsüogo, aser iba ajanga asayartem meyipa aruba sülen anogo pezü mesüra pongu tsüngda cash rewards agütsütsü asoshi lenmang lapoktsüogo.

India sorkar incentive scheme kübok gold medal angurtem nem lakh 30, silver angurtem nem senpet sen lakh 20 aser bronze medal angurtem nem senpet sen lakh 10 agütsür.

Ketdangsürtemi ashiba agi, iba telemtetba agiba ajanga asayartem shilem tajung agiba atema takaratiba nung parnok tushitsü asoshi sorkar tebilemba aliba sayur. 2030 Commonwealth Games densema international asayamung balala atema India renemba mapang iba ajanga asayartem ajungmesotsü imlar.

India team-i taküm Commonwealth Games nung kanga takok ngua asayaogo. Asayartemi ajak senteper medal 39 angu, kong gold 13, silver 17 aser bronze tekü anguba densema lir. Parnok overall medals table nung pezübuba nung tembangogo.

Asaya ajak rongnung Boxing asaya nung medal timba ngutetogo aser athletics, para-athletics, weightlifting aser judo asayartemia takok tajung ngutetogo.

Tanvi aser Srikanth nati anir Korea Masters asayatsü

Luroi/August 3, 2026 (Agencies): Anogo ishika tejakdangang Taipei Open akokba sülen Tanvi Sharma aser Kidambi Srikanth nati anir India nung asayartem Korea Masters Super 300 badminton asayamung asayatsü. Iba asayamung ya Mongolbarnü tenzüksü.

Arishi küm 17 tain Punjab nungi asayar Tanvi-i hopta tatemi Taipei Open final nung Vietnam tsür sixth seed asayar Thuy Linh Nguyen koka la indang career nung mezügbuba BWF World Tour title benogo.

Lai iba asayamung akokba sülen Tanvi ya iba asayamung akokba India tsürtem rongnung Saina Nehwal sülen tanabula kümogo. Maneni la ya BWF Super 300 mesüra iba dang nungi temaba jenjang nung aliba title abenba India tsür pezübula kümogo. La Saina, PV Sindhu aser Devika Sihag nung den denogo.

Iba asayamung nung tebur kija asaya trok aser tetsür kija asayar 10 asayatsü.

Tebur kija asaya nung

Kidambi Srikanth-a asayatsü. Pa US Open nung tanabuba jenjang nung tembangba sülen tang iba asayamung asayatsü lir. Ajisiüaka pa temang nung timtem aliba ajanga Canada Open nungbo masayatet.

Kiran George mezügbuba round nung qualifier ka den asayatsü saka pre-quarterfinals nung eighth seed Wang Po-Wei den asayatsü akok.

Saneeth Dayanand, mezügbuba asaya top seed Yudai Okimoto den asayatsü aser Rounak Chouhan fourth seed Jeon Hyeok Jin den asayatsü.

Maneni tebur tem rongnungi Tharun Manjunnath aser Mithun Manjunath nata asayaba angutsü.

Tetsür kija asaya nung Malvika Bansod mezügbuba round qualifier ka den asayatsü saka Tanya Hemant bo top seed Hina Akechi den asayatsü.

Aakarshi Kashyap mezügbuba round Kim Min Ji den aser Shriyanshi Valishetty Chinese Taipei tsür Pai Yu Po den asayatsü. Maneni Rakshit

Sree Santhosh Ramraj aser Ashmita Chaliha na qualifier den asayatsü.

Eighth seed Anmol Kharb, Hong Kong tsür Lo Sin Yan Happy aser Mansi Singh South Korea tsür Kim Joo Eun den asayatsü. Fifth seed Isharani Baruah-a South Korea tsür Lee So Yul den asayatsü.

Tetsür tarep asaya nung Sonali Singh aser Ritika Thaker na Priya Konjengbam aser Shruti Mishra na den asayatsü aser Priya Konjengbam o Shruti Mishra na Japan tsür Ririna Hiramoto aser Kokona Ishikawa na den asayatsü.

Tebur tarep asaya nung Krishna Prasad Garaga aser Pruthvi Krishnamurthy Roy na aser Bhargav Ram Arigela aser Viswa Tej Gobburu nata asayatsü renema lir.

Tarep temeyoktep asaya nung Ishaan Bhatnagar o Shruti Mishra na külem India nung Sathwik Reddy Kanapuram aser Radhika Sharma na den asayatsü aser Dhruv Rawat aser Maneesha K nata asayaba angutsü.

Newcastle-i Braga keeper Hornicek £25.7m agi alizükogo

Luroi/August 3, 2026

(Agencies): Newcastle United-i Braga nungi goalkeeper Lukas Hornicek pound million 25.7 agi alizükogo.

Newcastle-i tang transfer window nung Reims nungi arishi küm 20 tain Ewen Jaouen alizükogo, saka parnok ano number one asayar ka bushia liasü.

Arishi küm 24 tain Hornicek ya hopta tatemi Spain nung Newcastle indang training camp-i oa tenangzüktepba tembanga yangluogo. Pai küm pongu atema tenangzüktepba yangluogo.

"Ni iba club nung adentsüba osang angazükba sülen hopta tepeyong mesüngjemteti aruogo aser ni tang idaki arutetba atema pelar," ta Czech Republic nung asayar yagi ashi.

"Iba ya league tasen ka nung maongka tasen ka lir, aser iba atema ni yongyaseta atar. Ni ajaki kanga pelashishia agizük aser teyari agüja arudar.

"Newcastle ya football asaya meimba yimi ka ta ni meteta lir. Ni St James' Park nung fan 52,000 matsüngdang asayatsü asoshi matateter," ta Hornicek-i ashi.

Newcastle-i Hornicek terenlok kanga junga asadanga aruogo. Pai taoba season Braga pur Europa League semi-finals nung pai asaya tenet tashi nung goal ka danga mechi-i



Lukas Hornicek

kanga junga nokdakogo, koba iba asayamung nung goalkeeper kati goal mechi-i asaya timtiba nokdakba lir.

Newcastle sporting director Ross Wilson-i ashiba agi, arishi küm 24 tain asayar ya kümtem tsüngdang kanga renlokaogo.

"Pa ya Europe nung lanur goalkeeper tem rongnung tajungtiba ka lir," ta Wilson-i ashi.

"Taoba season kanga junga asayaba sülen taküm lemluwa club aikati Lukas alizüksü merangtsü ta onoki meteter liasü, saka pai onok den adentsü jangraba yakta dang reprangteta liasü," ta paisa ashi.

Newcastle pur taoba season Premier League nung asaya ti nung dang goal mechi-i liasü aser ajak senteper goal 55 achi. Parnok league table nung 15buba nung tembanga liasü.

India Test squad nung Bumrah melen Auqib Nabi shimogo

Luroi/August 3, 2026 (Agencies): Jammu and Kashmir nungi bowler Auqib Nabi tang mezügbuba India cricket team nungi asayatsü atema jaokogo. Jasprit Bumrah Sri Lanka den Test asayamung masayatetsüsa akümba sülen pa melen Nabi shimogo.

TimesofIndia.com-i taoba mapang Bumrah melen J & K pacer ya shimsü akok ta shir liasü. Arishi küm 32 tain Bumrah ya England den ODI asayaba mapang temekok tabelen yirushiba sülen tang tashi taneptsü junga monguteti lir.

"Tebur team shimba committee-i Bumrah melen Auqib Nabi shimogo. Jammu and Kashmir nungi fast bowler ya tang mezügbuba senior national team nung züngoksemogo," ta BCCI sangdong ka ajanga metetdaksü.

Nabi-i taoba Ranji Trophy season ana nung wicket 104 agiogo, kong 2025-26 campaign nung wicket 60 agia Jammu and

Kashmir-i mezügbuba Ranji Trophy akokba nung tongtibang shilem agia liasü.

Pa ya tawa Sri Lanka nung oa asayaba India A squad nunga densema liasü, kong pai first-class asaya ana nung wicket trok agia liasü.

Sri Lanka aser India na mezügbuba Test ya Galle nung August 15 nungi 19 tashi Galle nung asayatsü aser tanabuba Test ya Colombo nung August 23 nungi 27 tashi asayatsü.

Iba asayamung ya tang asaya aliba World Test Championship (WTC) cycle nung shilem ka lir.

Sri Lanka den asayamung atema India Test squad:

Shubman Gill (Captain), KL Rahul (Vice-Captain), Yashasvi Jaiswal, Rishabh Pant (WK), Sai Sudharsan*, Dhruv Jurel (WK), Ravindra Jadeja, Kuldeep Yadav, Manav Suthar, Mohammed Siraj, Prasidh Krishna, Gurnoor Brar, Devdutt Padikkal, Saransh Jain, Auqib Nabi.

BILEMDANGANG

"Takok anguba nisung ka masü saka jenjang aketba nisung ka akümtsü merangang."